

Inatsisartut Suleriaasianni § 33, nr. 1 naapertorlugu Nunat Avannarliit Killiit Siunnersuisoqatigiiffiannut Inatsisartut aallartitaasa siulittaasuata aalajangiiffigisassatut siunnersuut manna saqqummiuppaa:

Nunat Avannarliit Killiit Siunnersuisoqatigiiffiata kaammattuutaa nr. 2/2013 Inatsisartunit akuerisassatut siunnersuut Inatsisartut akuersissutigissagaat:

Nunat Avannarliit Killiit Siunnersuisoqatigiiffiata Savalimmiuni, Islandimi Kalaallit Nunaannilu naalakkersuisunut kaammattuutigaa nunat pineqartut akornanni pilattaasarnermut tunngasut qitiutillugit peqqinnissaqarfiit akornanni suleqatigiittoqalernissaanut suliniuteqaqqullugit. Nunat pineqartut kaammattorneqarput tamanna pissarsiviusumik iluaqutissartaqartillugu pilattaasarnerit assigiinngitsut eqqarsaatigalugit akunnermini piginnaasatik iluaqutiginiqqullugit. Islandimit iviangikkut kræfteqalersimasumik pilattaasartoq ullumikkut Savalimmiuni atorneqalereersimavoq qaammatikkaartumik Savalimmiuliartarnikkut. Nunani pingasuni peqqissutsimut naalakkersuisut kaammattorneqarput taamatut periaaseqarnej annertusaqqullugu aamma suliassaqarfinnut allanut atuuttussanngorlugu, isumaqatigiissuteqaqqullugillu nunat tamarmik peqataanissaannik, sullissatut sullinneqartutullu.

(Nunat Avannarliit Killiit Siunnersuisoqatigiiffianni Inatsisartut aallartitaasa siulittaasuata, Lars Emil Johansen)

Akissuteqaat

(Peqqissutsimut Attaveqarnermullu Naalakkersuisoq Steen Lyng)

Siullermeerinnineq

Nunat Avannarliit Killiit Siunnersuisoqatigiiffiata kaammattuutaa nr. 2/2013 Inatsisartut akuersissuteqarnissaat pillugu siunnersuummut Naalakkersuisut qujapput.

Siunnersuuteqartoq Naalakkersuisut isumaqatigilluinnarpaat, nunat avannarliit killiit taakku pingasut peqqissutsimi suleqatigiinnerup annertusarnissaa iluaqutigissagaat. Nunani avannarlerni killerni innuttaasut ikinnerat isorartuumilu nunassittarneq pillugit assigiinnik amerlasuunik unammilligassaqarput. Katsorsaanissamut periarfissat nunani sanilitsinni pitsanngorsarneqartuarput.

Peqqissaanermi immikkut ilisimasallit sulisoriinnarneqarnissaat ineriartornissaallu peqqinnissaqarfiup sulissutiguarpaat, taamaalilluni napparsimasut nutaaliaanerpaat atorlugit katsorsarneqarsinnaaniassammata. Unammilligassap taassuma peqqinnissaqarfik aningaasatigut ajornartorsiortittuarpaat. Tamanna tunngavigalugu pingaartuuvoq peqqinnissaqarfimmi suleqatigiinnerup pitsanngorsarnissaa, tulluartautilillugu aningaasatigullu iluaqutaatillugu assersuutigalugu sullississutinik pisiffiqatigiittarnikkut.

Nunani avannarlerni killerni ministereqatikka januarip qaammataani ataatsimeeqatigakkit suleqatigiinnerup pitsanngorsarnissaa aallarnisareerpara. Kalaallit Nunaat peqqissutsimi suleqatigiinneq pillugu Islandimi peqqinnissaqarfimmi katsorsaasarneq pillugu Islandimi

peqqissutsimut ministeqarfimmut ullumikkut isumaqatigiissuteqarpoq. Isumaqatigiissut taanna suleqatigiinnermik ingerlalluarterujussuarmik tunngaviliinikuuvoq. Ataatsimiinnermi oqallinnigut aallaavigalugit Islandimullu isumaqatigiissuterput isumassarsivigalugu Nunani Avannarlerni Killinnerni siunissami peqqissaaneq pillugu suleqatigiinnermi qulliunerusumik ataatsimut isumaqatigiissutissaq Savalimmiuni peqissutsimut ministereqarfiup maannakkut suliaraa.

Peqqissutsimut Pitsaaliuinernullu Aqutsisoqarfiup Reykjavikimi Landspitali februarimi 2014-imi tikeraarpaa. Ataatsimiinneq kinguneqarpoq napparsimasut aalajangersimasut pillugit suleqatigiinnerup annertusarnissaa pillugu ataatsimut kissaateqarnermik. Siullermik napparsimasut sivilukitsumik katsorsarneqartussat pineqarput, assersuutigalugu tartumik ujarattaajaasarneq, taavalu pilaanerit sivilunerusumik Reykjavikimiinnissamik pisariaqartitsisussatut ilimagineqartut pillugit kalaallit napparsimasut inunnik attaveqartarnertarnermi attaveqarfigisartagaasa annertusarneqarsinnaanera utaqqimaarneqarluni.

Ivianginik pilaasarneq Savalimmiunut suleqatigiissutaalernikoq pillugu siunissami suleqatigiissinnaaneq tikeraarnermi aamma eqqartorneqarpoq, tassani Islandimi pilaasartuq pisariaqartuqartillugu Savalimmiunukartarluni napparsimasullu iviangikkut kræftillit pilattarlugit. Arlalinnilli aporfissaqarpoq, ilaatigut nappaammik Kalaallit Nunaanni suussusiliisoqarsinnaannginnera, suleqatigiittoqalissappalli tamanna aaqinneqartariaqarpoq. Peqqissutsimut Pitsaaliuinernullu Aqutsisoqarfik Dronning Ingridip Napparsimavissuani init sullissinermilu atortut takutinniarlugit Islandimi pilaasartuq upernaq manna kingusinnerusukku qaaqunikuuaa. Kissaatigineqartuq tassaavoq Dronning Ingridip Napparsimavissuani iviangit piginnarniarlugit pilaasarnermik pilersitsineq imaluunniit taamaaliortoqarsinnaanngippat sivilukitsumik Islandimiinnikkut kalaallit napparsimasut pilanneqarnissamik neqeroorfigineqarnerat. Ivianginik pilaasarneq pillugu suleqatigiinneq napparsimasunik tartup ujarattaajaasarneq ilanngullugu pilaasarnermi immikkut ilisimasaqarneq pillugu suleqatigiinnerup ineriartorteqqinnissaanut tunngaviliissaaq, tassani qatikkanik pilaasarneq periarfissatut ilaatigut oqaatigineqarluni.

Tamanna tunngavigalugu Nunat Avannarliit Killiit Siunnersuisoqatigiiffiata kaammattuutaa nr. 2/2013 Inatsisartut akuerissagaat Naalakkersuisut inassuteqaatigaat.